

# Regatta.lu Sailing Students

- vum 30. August bis de 5. September 2020 an der Bretagne -

## **De grouse Lëtzebuenger Segel-Event an der Baie de Quiberon elo och fir Studenten.**

Fir d'éischte Kéier invitéiert de Segelclub GLCR d'Lëtzebuenger Studentinnen a Studenten fir bei der Regatta.lu matzemaachen, deem grousem Segel-Event an der Bretagne. Déi Manifestatioun, déi säit 2016 all Joer an der Ouschtervakanz gemaach gouf, war bis fir Schüler aus de Lëtzebuenger Lycéë reservéiert, an dat mat grousem Erfolleg : d'lescht Joer hunn 31 Equipagen mat je 4 oder 5 Jonken dorunner deelgeholl. A vill Studenten hu bestëmmt flott Souveniren un déi Experienz aus hirer Lycées-Zäit.

Wéinst der Corona-Kris huet d'Regatta.lu dëst Joer missen op d'Enn vun der Summervakanz verluecht ginn. Gläichzäiteg hunn d'Organisateuren decidéiert, den Event och fir Studenten opzemaachen, an domat Regatta.lu Sailing Students an d'Liewen ze ruffen.

## **Regatta.lu - Wat ass dat ?**

Regatta.lu ass eng sportlech Competitioun (Regatta = Course um Waasser), bäi där een och ka matmaachen, wann ee nach keng Erfahrung am Segelen huet. All Equipage besteet aus 4 oder 5 Studenten, déi op engem Boot zesumme mat engem Skipper an engem Co-Skipper vum GLCR un der Course deelhuefen an sou op eng aktiv a spannend Manéier segele léieren. Virun allem awer ass Regatta.lu och eng Woch Zesummeliewen u Bord vun enger 10-m-Yacht. De Fun ass garantéiert.

## **Wien organiséiert dat ?**

Regatta.lu gëtt vum gréisste Lëtzebuenger Segelclub GLCR (Groupe Luxembourgeois de Croisière et de Régate) organiséiert, an Zesummenaarbecht mat der Segelfederatioun FLV an dem Service National de la Jeunesse (SNJ). En agespilltent Team, wat scho 4 Editiounen fir d'Schüler organiséiert huet, an sech drop freet, dass dëst Joer och eng Rei Studentebooter matfueren.

## **Wéi leeft dat of ?**

Lass geet et sonndes owes, den 30. August. Mir fuere mat Bussen d'Nuecht duerch bis op Port-Haliguen bei Quiberon. Do kritt all Equipage säi Boot, a ka scho méindes fir en éischten Training op d'Waasser eraus. Vun dëschdes bis freides ass dann Training a Competitioun an der Baie de Quiberon, mat enger Escale vun zwee Deeg op Belle Île, eng wonnerschéin Insel déi virun der Bucht läit. Iwwernuecht gëtt op de Booten, an d'lessen ass zum Deel op de Booten, an zum Deel an den Häfen, an engem groussen Zelt oder am Restaurant, souwäit wéi een dat bis dohinner erem dierf maachen. Dëschdes owes ass och eng grouss Party mat DJ a Buffet geplangt.

Fir de Retour geet et freides owes vun La-Trinité-sur-Mer aus mat de Busse fort, fir Samschdes moies, de 5. September, erëm zu Lëtzebuerg ze sinn.

## **D'Aschreiwunge sinn elo op !**

D'Participatioun u Regatta.lu Sailing Students kascht 590 € pro Persoun. An deem Präis ass alles dran : d'Locatioun vun de Segelyachten, den Aller-Retour mam Bus an d'lessen an Drénke vun der ganzer Woch (u Bord, am Restaurant a bei der Party). D'Organisatioun an den Encadrement gëtt komplett vu Benevole gemaach.

D'Aschreiwunge lafen exklusiv iwwert de Site [www.regatta.lu](http://www.regatta.lu). Do fënnt een och vill weider Informatiounen iwwert den Event. D'Umeldung sinn individuell, mee natierlech kënnt Dir lech als kompletten Equipage umellen, fir zesummen op engem Boot ze sinn. Et kënnen Equipage mat nëmme Studentinnen a Studente vun enger Uni oder aus enger Stad gebilt ginn, mee och gemëschten Equipagen si kee Problem.

No der Umeldung huelen dann ären Skipper a Co-Skipper Kontakt mat lech op. Dir kënnt si dann treffen, an si ginn lech all néideg Informatiounen. Eng Reunioun mat alle Participanten ass fir de 9. Juli um 18h30 am Lycée Josy Barthel zu Mamer geplangt, souwäit e bis dohinner erem zu sou eng Versammlung dierf zesummekommen.

**ALL ABOARD !**



**Regatta.lu**

*Sailing Students*

### **Éléments clés de Regatta.lu – Sailing Students 2020**

Dates : du 30 août au 5 septembre 2020

Lieu : Bretagne – Baie de Quiberon

Participants : chaque équipage sera composé de 4 ou 5 étudiants, d'un skipper et d'un co-skipper

Organisateurs : FLV, GLCR, SNJ

Informations et inscriptions : [www.regatta.lu](http://www.regatta.lu)

Actualités : [www.facebook.com/regatta.lu](https://www.facebook.com/regatta.lu)